

Regional News Unit AIR Aizawl

Monday, July 01, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Disaster Management & Rehabilitation Dept chuan fur ruah ngawrh taka tla mekah chungtin te fimkhur turin a chah.**
- 2. CYLA-in Myanmar lama phurh luh tur petrol leh diesel phurte chhun-zan-zawmin a la dang chhunzawm.**
- 3. Indian Meteorological Department chuan ramchhung hmarthlang, khawchhak leh hmarchhakah ni 3 atanga ni li chung ruah sur nasa tur avangin mipuite inralring turin a hriattir.**
- 4. Vawiin atangin ramchhungah Criminal Laws thar pathumte hman tan a ni dawn**

<><><>

MONSOON

Mizoramah fur ruah a thawh rualin, hmun thenkhatah thli leh tek te nen a thawh theih thu Aizawl Metereological Centre chuan a sawi a,

An thlirlawk danin Mamit, Kolasib, Lawngtlai leh Siaha District ah te ruah nasa tak sur thei a ni a, Lunglei leh Hnahthial District ah pawh ruah a tam hle thei bawk a ni.

Hetiang anih avang hian, fimkhur a tul thu Disaster Management & Rehabilitation Dept chuan thuchhuah siamin a sawi a, chhiatna thleng thulhah englai pawhin District Emergency Operation Centre, District tin Dc ah biak pawh theih a ni tih a tarlang a ni.

<><><>

PEACE DAY

Nimin June ni 30 kha Mizoram 'Remna Ni', kum 1986-a khatih laia India laka inlakhran tuma rammu MNF leh sorkar laipui-in remna thuthlung an ziah champhaphak a ni.

Kum 1966-a MNF-te'n India laka hel a zalenna an sual hnu-ah India Constitution huangchhunga inremna zawngin kum tam tak an inbia a. Tharum thawhna nasa tak karah mipui an rum a, remna a awm theihna atan inbiakna kalpui a ni a, kohhrante an tawngtai bakah pawl hrang hrang, a bikin zirlai pawlte chuan remna leh muanna a awm theihna atan theihtawp an chhuah a. Chutianga beihna avang chuan kha tih lai a Prime Minister Pu Rajiv Gandhi leh MNF president Pu Laldenga chuan remna an siam thei ta a. June ni 30, 1986 zana Delhi-a Inremna thuthlung ziahna-ah hian sorkar laipui mi pawimawhte bakah Mizoram hruaitu engemaw zat an tel a. Inremna thuthlung hi Pu Laldenga'n MNF aiawhin a hming a ziah hnan a, sorkar laipui aiawhin khatih laia Union Home Secretary Pu R. D. Pradhan leh Mizoram Chief Secretary Pu Lalkhama te'n an hming an ziak ve bawk a ni.

Kumin Remna Ni hi Pathianni a a tlak avangin Zirtawpni khan a lawmna hun hi Mizoram pumah lawm a ni.

<><><>

EMBARGO

Central Young Lai Association (CYLA)-in kar kal ta Thawhtanni atang khan Myanmar lama phurh luh tur petrol leh diesel phurte chhun-zan-zawmin an la dang chhunzawm zel.

CYLA general secretary Pu Joseph Lalhmingthanga Chinzah chuan Aizawl, Lunglei leh Hnahthial atanga Lawngtlai district kal tlanga Myanmar lama diesel leh petrol phurh luh tumte chu Police bakah YLA mi tlawmngaite'n chhun zan zawmin hmun hrang hrangah an la dang niin a sawi a. Petrol pump 4 awmna Lawngtlai khawpui bakah Sangau leh Bungtlang South a filling station awmte atanga Myanmar lama petrol leh diesel phurh luh khap a ni bawk. Hetianga Myanmar lama to tak taka hralh tur petrol leh diesel phurh luh hi an khap chung chuan a veng turin an duty thu CYLA hruaitute chuan an sawi. Kar kalta Thawhtanni khan CYLA chuan Myanmar lama bungrua, a bik takin petrol leh diesel phurh luh hi tiam chin awm lova an khap thu an chhuah a. A hlawm a petrol leh diesel tam tham tak taka phurh chhuah a nih avang hian mipui mimir leh Lawngtlai district a hmasawmna hna thawktu company leh contractor-te'n harsatna an tawh phah nasa hle niin an sawi a. Hei bakah hian Myanmar a mipui rorelna din tura Chin pawl indinte chu hetiang eitur leh petrol leh diesel lo hmangtu Arakan hel pawlte'n an rap betin an kap thin a. Ti tawh lo tura an tih hnu pawhin an sim duh chuang lo a ni, an ti.

A hma May ni 25 khan Myanmar a bungrua, a bikin petrol leh diesel thawn luh hi CYLA te chuan an lo khap tawh a. Arakan Army leh United League of Arakan (ULA) hruaitute nena an inbiak hnu-ah June ni 11 khan bungraw phurh luh khapna hi hlih a ni a. Mahse, Arakan hel pawlte hian an intiamna ti hlawhtling lova Chin state chhim lama Chin pawlte an la kah zui zel avangin June ni 24 atang khan bungraw lakluh hi khap chhunzawm leh a ni ta a ni. Lunglei district DCSO leh Siaha district bawrhsap pawhin petrol leh diesel man to zawka hralh leh tura lei khawl vak vak khapna hi an lo chhuah tawh a. Hei hi mipui leh hmasawmna hnathawktu company liante'n harsatna an tawh nasat vang niin an sawi a ni.

Lawngtlai district atanga petrol leh diesel phurte hian Kaladan Multi Modal Transit Transport Project (KMMTTP) kawngpui zawhin Hruitezawl khua-ah an inpechhawng tlangpui ni-in an sawi a. Siaha district atanga phurte chuan Tipa (Tuipang) lam panpui-in Lungpuk piah Salechhuah khua chu an inhlanchhawmna hmun deuh ber a nih thu an sawi bawk. Petrol leh diesel man to zawka hralhtute hian plastic barrel litre 230 leh 240 inkar vel lengah litre 220 an thun tlangpui a. Hetiang plastic barrel hi 'PVC drum' emaw 'Oil drum' emaw tiin an sawi mai a. Tunhma a bur khat cheng 1,300 a an lei thin kha mamawhna a san tak avangin cheng 2,700 te a kai a, tunah hian cheng 2,000 velin an hralh tlangpui a ni.

Heti hlahi hian Siaha district a pawl lian ber MTP chuan CYLA-in inbiakna pawh awm lova petrol leh diesel Siaha district atanga Myanmar lama phurh luh an khap chu an lungawi loh thu an sawi ve thung a. Siaha district atang chuan Myanmar lamah phurh luh reng a la nih thu dawn a ni.

Chin state chhimlama inkulh Arakan hel pawlte hian petrol leh diesel leina atan hian pawisa an ren lo hle ni a thudawn a ni a. Mizorama litre khat cheng 94 vel kha litre khatah Rs 150 leh a ai a to pawhin an lei ngam ni a hriat a ni.

<><><>

ESCAPED PRISONERS

Kar kal ta Zirtawpni a ruihhlo vanga Central Jail a tang mek mi 4 tlanhhuakte chu zawn zui zel an la ni.

IGP (Law and Order) Pu Lalbiakthanga Khiangte hnen atanga Akashvani Aizawl-in thu a dawn danin tang tlanhhuakte hi Manipur mi vek an ni a, tunah hian Manipur-ah an lut tawh nge Mizoram lamah an la awm tih hriat a la ni lova. Police Station zawng zawngte hriattir an nih bakah khawtlang hruaitute pawh an awmna hria chuan Police hnena hrih vat turin an hriattir niin a sawi. Tang palite hi district court-a hruai an ni a, jail lama phurh let leh an nih lai-in prison van boruak luhna lai tichhia-in an tlanbo ta a ni. Tang tlanhhuakte hi Paoboi Singson (33), Genkhopao Haokip (24) leh Augustin Seikholal Haokip (23) Churachandpur, Manipur amite leh Daniel Lalzathang Baite (20) Bongmol khua Manipur amite an ni a. Mizorama ruihhlo lakluh vanga man an ni a, an thubuai court-in a ngaihtuah lai mekte an ni.

Tun hnai-ah Central jail bakah district jail hrang hrang atanga tang tlan chhuak sawi tur an awm reng a. Mizoram tanin tam ber hi tang awm thei zat aia tam awmna deuh vek, hnathawktute indaih loh bakah tanin pawh chhia leh rawih tawh tak tak a ni deuh vek a. Sorkar chuan siamthatna turin sum a ruahman mek ni a hriat a ni.

<><><>

FIR

Centre for Environment and Social Justice (CESJ) chuan Bawngkawn Police Station-ah National Highway Infrastructure and Development Corporation Limited (NHIDCL) Aizawl bialtu executive director lakah FIR an thehlut.

CESJ working chairman Pi Vanramchhuangi'n FIR a thehluhah chuan NHIDCL hnuaia hnathawktute'n Zemabawk leh Seling inkara kawng an laih danah ram leilung leh nungchate chenna nasa taka tihchhiat a nih thu a sawi a. Hei bakah hian kawngpui zauhna atana kawng thlang lama an lung remte chu leivung chung a rem chho tawpin tam tak chu a chhe leh tawh a, chhe leh mai tur pawh engemaw zat a awm a ni a ti a. Hetianga an hnathawh a chhiat em avang hian a thlang lama in leh huan a chengte tan pawh a him lo hle a, kawngpui hmangtute tan pawh a hlauhawm a ni a ti. Kawngpui dawlna derthawng lutuk a siam a ni hi mithiam leh engineer-te'n an enpui hauh lo a ni tih a chiang a, hlawk duh luat avanga mipui himna ngaihthah a an thiltih avang hian CESJ chuan a mawhpurtute dan hmanga hrem an phut a ni.

<><><>

SENTENCE

Zirtawpni a Aizawl Special Court (Prevention of Corruption) in thiam loh a chantir tak State Bank of India Mission Veng branch a manager hlui Lalkhomang Guite leh Aizawl Sacred Heart Society hotu Gary T. Haokip te hremna chu vawiinah Special Court hian a puang dawn.

Lalkhomang Guite, Churachandpur Manipur leh Gary T. Haokip, Aizawl Republic Mual Veng-te hi kum 2006 leh 2007 inkar chhunga a tak awm lo Self Help Group hminga cheng vaibelchhe 2 leh nuai 10 chuang loan pek chhuah kawnga dan bawhchhia a puh an ni a. CBI in an chhui hnu-ah Special Judge Dr. HTC Lalrinchhana chuan Zirtawpni khan IPC section 120-B leh section 420, 468, 471 bakah Prevention of Corruption Act, 1988 section 13 (2) leh section 13 (1)(d) tlawhchanin thiam loh a chantir a. Hemi ni vek hian Central Jail-ah thawn thlak an ni. Vawiin hian court-ah hruai leh an ni ang a, chutah chuan Judge hian a hremna tur a puang dawn a ni.

Selh Help Group 20 zet hminga loan pek chhuah hi Lalkhomang Guite hian a pawmsak a, Self Help Group aiawh a hming ziahte hi Gary T. Haokip kutziak vek a ni tih hmuhchhuah a ni bawk a. Hetianga pawl dinte hi cheng nuai 5 theuh loan pek chhuah an nih lai-in an dawn tur zat hria an awm lova, a dawng tam pawlin cheng nuai khat an dawn lai-in tam tak chuan Rs 50,000 an dawng a. An dawn bang zawng leh Khadi and Village Industries Commission (KVIC)-in a lo do vena tur cheng nuai khat leh sing nga theuh an dawn tur pawh thiam loh chantir takte pahnih hian an insem vek niin CBI chuan an ngai a ni.

<><><>

IMD

Indian Meteorological Department chuan ramchhung hmarthlang, khawchhak leh hmarchhakah ni 3 atanga ni li chhung ruah sur nasa tur avangin mipuite inralring turin a hriattir a. Heng hmunah te hian IMD chuan inralring tura hriattirna orange leh red alert a tichhuak a ni. IMD sawilawk danin Himachal Pradesh, Uttarakhand, Punjab, Haryana, Chandigarh, East Rajasthan, leh Uttar Pradesh ah te tun thla ni 3 thleng ruah a sur nasa dawn a. Ramchhung chhaklam leh hmarchhak lam Bihar, Sub Himalayan West Bengal, Sikkim, Arunachal Pradesh, Assam, Meghalaya, Nagaland, Manipur, Mizoram leh Tripura ah te ni hnih atanga ni 3 chhung ruah a sur bawk ang.

Thlang lamah Gujarat, Central maharashtra leh Goa ah te tun thla ni 4 thleng ruah nasa takin a sur dawn a. South India ah Tamil Nadu, Puducherry, Kerala, South Interior Karnataka ah te naktuk thlengin ruah sur tura hrihlawk a ni a. Lakshadweep, Coastal Andhra Pradesh, Telangana leh Coastal Karnataka ah te tun thla ni 3 thleng ruah a sur rin a ni bawk.

<><><>

CRIMINAL LAWS

Vawiin atangin ramchhungah Criminal Laws thar pathumte hman tan a ni dawn. Misual leh pawikhawihute hremna leh an chunga rorelna dan thar pathumte hi Bharatya Nyaya Sanhita 2023, Bharatya Nagarik Suraksha Sanhita 2023 leh Bharatya Sakshya Adhinyam 2023 te an ni a. Sawrkar laipui chuan State leh Union Territory te nen inhmuhkhawm vawi tam tak koin he dan thar hmang tur hian theihtawpa inpuahchah a ni a.

**Technology lamah te, bungrua leh hmunhma chungchangahte leh mipui
mimir inhrilhriatna lamah te he dan thar hman anih theih nan hian hmalak a
ni a. He dan thar hi nikum Parliament thlasik thutkhawmah khan pass a ni a.**

<><><>